

Исусонь Кростосонь шачемац

1 Ся пингть Август римонь кесарсь кошардсь сёрмадомс ломаттнень марнек модастонза. 2 Тя ульсь васенце сёрмадомась, сон ётафтовсь мзярда Сирияса азорондась Квириной. 3 Сембе тусть прянь сёрматфтома, эрьсь эсь атянь-авань ошезонза. 4 Иосифовок тусь Галилеянь Назарет ошта Иудеяв, Давидонь шачема ошу, кона лемневсь Ветлеем; Иосиф шачемас коре ульсь Давидонь юромста. 5 Сон тусь прянь сёрматфтома Мариянь мархта, кона ладяфоль тейнза рьвакс и учсь идня. 6 Ветлеемса улемстост Мариянь сась шачфтома пингоц. 7 Сон шачфтозе эсь цёранц — васенценянц, ашкодозе сонь нуласа и путозе ракшань андома вастс, сяс мес инжиень кудса тейст ашезь сата васта. 8 Ошть маластонь паксяса ульсть ракша ваныхть, конат веть ванфтозь эсь ракшаснон. 9 Апак учт инголест эвондась Азорть ангелоц, и синь валдоптозень Азорть иневалдоц. Синь сявозень оцюдонга оцю пелема. 10 Ангелсь мярьгсь тейст: «Тяда пеле; мон тейнтъ азан пяк оцю куля, кона ули оцю кенярьксокс сембе ломаньтналти: 11 тячи Давидонь ошса шачсь тейнтъ Идись, сон Кростос, Шкайтъ Кочкафоц, Азорсь. 12 Вов тейнтъ тяшкс: тинь мусастъ иднять ашкотфста ракшань андома вастста». 13 Апак учт ангелть ваксса эвондась нинге менелень лама ангел, конат шназь Шкайтъ и ювадсть: 14 «Шнама вяре Шкайти, седи ваймама модать лангса ломаттненди, кинь кельгсыне Шкайсь!» 15 Мзярда ангелхне кеподсть меки менели, ракша ваныхне мярьгсть фкя-фкянди: «Аряда Ветлеему и ванцаськ, мезе тоса тиевсь, мезть колга пачфтсь тейнек латта Азорсь». 16 Эрызста пачкодсть, музь тоста Мариянь мархта Иосифонь и иднять, кона ракшань андома вастсоль. 17 Тянь няемста синь азондсть сянть колга, мезе тейст ёфтафоль тя иднять квалма. 18 Сембе кулисна дивандасть сянди, мезе азондсть тейст ракша ваныхне. 19 Мария семботь ванфтозе седисонза и арьсекшнесь тянь колга. 20 Мрдамста ракша ваныхне шназь Шкайтъ и азондсть тейнза сюкпря сембонкса, мезе кульсть и няйсть. Сембось ульсь афкукс стане, кода тейст азфоль.

